

吳伯雄
編

陳壽祺全集

40



廣陵書社

陳壽祺全集

 廣陵書社

第四十冊

卷二百之一明人物列傳建寧府……………一

卷二百之二明人物列傳延平府汀州府邵武府……………四九

卷二百之三明人物列傳泉州府（一）……………一二一

卷二百之四明人物列傳泉州府（二）……………二六五

卷二百之五明人物列傳泉州府（三）……………三八九

卷二百之六明人物列傳漳州府……………四八三

重纂福建通志卷二百之一

人物

明建寧府列傳

建安縣黃仁

楊榮

子恭仕

讓錫曾孫昂

錫次子崇

黃仲芳

雷

璩楊旦

林命

甌寧縣鄭賜

鄭以誠

范嵩

子宣

李默

滕伯輪

浦城縣徐善安

王許

徐奇

潘賜

劉亢

陳遜

張善

張鵬

徐浦

徐民式

弟民俊

曾六德

松溪縣葉逢陽

子詩

魏濬

真憲時

政和縣黃童

吳廷用

建安縣

黃仁字淵靜其曾祖定宋末居六合爲兵馬副都監與元戰敗咬都擒定將殺之定女叩馬求解咬都義之釋其縛使從略地閩中

權授忠武校尉建寧路下千戶命領兵攻沙縣定引疾固辭居建安終老焉仁負異資受易於陳孟龍復質所疑於仲父居德學日進舉洪武四年鄉試明年會試吏部急於用人不俟再試擢太常贊禮郎宋濂甚愛之時以學問相勗仁因執經從濂遊七年太常卿唐鐸奏請遣官祀山川百神詔選太常官屬及儀制主事凡七人分遣諸省仁與焉陞辭之日帝諭仁等曰敬恭明神古今恆道況瀕祭之時乎祭在他人亦所當慎況職在奉常乎已盡其職猶難況欲莅人而使其莊敬乎皆不可不察也爾等聞命之後雖跋涉險阻一言一動有赫其臨參前倚衡無乎不在勿使一毫非僻之干庶幾不廢朕命仁等皆稽首而退復勅禮臣各賜衣一襲御史中丞劉基參知政事陶安吏部尙書詹同等皆有詩贈行仁初

名文仁有司援例以犯周文王諡加水於左爲汶仁及解名上中書吏以白右丞相汪廣洋廣洋曰仁之義甚宏無所不包其可冠以汶乎乃去之

楊榮初名子榮字勉仁祖福興字達卿家故饒貲夜有盜踰垣入聞人聲驚走急不得門福興爲鑰出之鄰李必延貧甚爲債家所窘將鬻妻以償福興代償所負夫婦得完後二年寇逼郡城有稱總管者詣福興門謁拜則必延也邀福興挈家行福興曰生我家孰與生我一郡今城守完固勇敢士不少寧獨若等之利耶必延叩首曰公福德人必延不敢違請言之帥明日寇解去一郡獲全行省左丞阮德柔來駐建寧聞福興名禮致之命諸子旦夕侍福興從容導以持謙約去驕溢其子化焉他日言於德柔曰今賦

役煩苛鰥寡之民尤可矜惻德柔遽下令減罷於時行省承制得除官因強之仕力辭乃止福興好爲德每歲首設酒食會鄉人戒毋焚山林恐傷昆蟲草木之生有截流毒魚採巢取鷇者皆予之穀戒勿爲值大饑欲出粟振而惡有其名因募人樹木計所樹多寡給粟民喜得粟爭趨事數歲木鬱然成林則以給民之貧無居室歿無葬具者且戒子孫世率行之父伯成字士美事親孝謹篤友愛鄉人子弟貧不能從師者開學聚而教之舉秀才徵書累至以養母辭後復以孝廉徵亦不就榮舉建文己卯鄉試第一庚辰成進士授編修成祖入京榮迎謁馬首曰殿下先謁陵乎先卽位乎成祖遽趣駕謁陵受知自此始卽位進修撰爲更今名時初建內閣簡儒臣七人專典機務七人者榮及解縉胡廣黃淮胡儼

金幼孜楊士奇也榮年最少一日晚寧夏報被圍帝趣召七人獨榮在帝不懌曰爾後進寧解此已出奏示之曰爾且言遣何所兵往榮曰寧夏城堅人習戰奏上已十餘日圍當解矣但敕守臣固守及鄰近諸堡加防不必遣兵夜半果奏圍解再遷至侍講寵遇日隆然入謀於內未嘗宣於外太子立進諭德仍兼前職與在直諸臣同賜二品服四年二月得寒疾命中官偕御醫往視且命時時報病狀及疾愈入謝帝加慰賚令休息旬餘乃出帝與諸大臣議事未決或至發怒榮至輒霽顏事亦隨決五年命往甘肅經畫軍務所過覽山川形勢察軍民閱城堡還奏武英殿帝大悅值盛暑親剖瓜噉之尋進右庶子兼職如故明年以父喪給傳歸既葬起復視事又明年母喪乞歸帝以北行期迫不許命同廣幼孜扈

從榮熟於邊事甘肅總兵官何福言脫脫不花等請降需命於亦
集乃命榮往甘肅受降持節即軍中封福寧遠侯八年從出塞度
野狐嶺帝召榮及廣指示山川聚落等語良久奉制馬上賦詩榮
詩有寇自相殘語已而謀報本雅失里與其下阿魯台相攻皆竄
走帝謂榮曰卿詩驗矣賜之牢醴至凌霄峯與廣幼孜刑部侍郎
金純迷失道陷谷中幼孜墜馬廣純不顧而去榮爲結鞍行又輒
墜榮即所乘馬讓之明日始達行在所是夜帝遣使十餘輩迹二
人不獲比至大喜謂幼孜曰此中多狼汝非榮殆將不免榮曰僚
友之誼宜然也帝曰廣純獨非友耶五月次臚胸河帝選勇士三
百人爲衛令榮領之師旋餉不繼榮請盡以供御之餘給軍而令
軍中有餘者得相貸入塞官爲倍償軍糧以濟

按明史紀事本末
以此爲二十二年

六月事非是榮在軍以親喪不御酒肉時哭泣不自勝因以羸瘁帝深

憐之九年乞奔母喪遣中官護行還詢閩中民情及歲豐歎榮具以對賜大官酒饌復其家尋命侍諸皇孫讀榮講授有程度諸皇孫多所補益皇太子召榮獎曰他日學成汝之功也榮在春坊每進講必從容以正心務德親賢去邪尙儉戒逸之言進深見嘉納或訪以政務必陳其切要及先後緩急施行之序無少避忌兩坊僚屬莫不聳服焉何福卒西寧侯宋琥代將言叛寇婁達袞謹按諸書

均作老的罕欽遵御批通鑑輯覽校正 逃赤斤蒙古且爲邊患乃復遣榮至陝西會

豐城侯李彬議進兵方略榮還奏言出嘉峪關千里險阨乏水草餉道弗能通又沍寒士馬疲瘠且有罪不過數人不足以勤大軍乃賜勅詰責赤斤蒙古縛婁達袞來獻明年復與廣幼孜從北巡

又明年三月征瓦剌太孫侍行因命榮閒陳說經史四月駐蹕興和合兼領尙寶事凡宣詔出令及旗志符驗必得榮奏乃發師次大石鎮帝晚坐行幄召榮計兵食榮對曰擇將屯田訓練有方耕耨有時不患兵食不足也十二年與幼孜俱進翰林學士仍兼庶子從還京師大宴羣臣第功榮與幼孜以五品特敕與兵部尙書方賓同列坐十一月命纂修五經四書性理大全以榮等總其事十五年復從北征十六年胡廣卒命榮掌翰林院事益見親任諸大臣多忌榮欲疎之其舉爲祭酒帝曰榮今職誰代諸大臣乃不敢言榮知帝意向已悉發府部院寺諸曹積弊以聞帝曰汝爲近臣恐諸臣益相猜疑不如付御史言榮退令鄧真入奏帝因下詔切責諸大臣皆免冠頓首請罪十八年進文淵閣大學士兼學士

如故明年定都北京營建規制多出於榮無何奉天華蓋謹身三殿災將及祕閣榮麾衛士出圖籍制誥昇東華門外帝褒之二十一年復從出塞軍事悉令參決已復下詔征阿魯台或請調建文時江西所集民兵與餽運丁夫十餘萬帝問榮榮曰陛下許民復業且二十年一旦徵之非示天下信且動眾非仁料兵非勇帝曰朕意固如此明年又從出塞駐宣府軍務悉委榮晝夜見無時帝時稱楊學士不名也也先土干款塞羣臣議莫決榮獨請往受降而歸又明年復北征是時帝凡五出塞士卒饑凍饋運不繼死亡十二三大軍抵答蘭納木兒河不見敵帝問羣臣當復進否羣臣唯唯惟榮幼孜從容言宜班師帝許之還次榆木川帝殂中官馬雲等莫知所措密與榮幼孜入御幄議二人議六師在外去京師尙

遠祕不發喪以禮斂鎔錫爲梓載輿中所至朝夕進膳如常儀益嚴軍令乃具大行月日及遺命傳位意啓太子榮與少監海壽先馳訃既至太子命榮與蹇義夏原吉議諸所宜行者明日議赦詔榮首條民間不便二十餘事并納之仁宗卽位進太常卿餘官如故尋進太子少傅謹身殿大學士有言榮當大行時所行喪禮及處分軍旅事狀遂降敕獎諭曰卿盡忠爲國報先皇帝恩德獨爲果斷曩者哀悼倉皇之際報卿甚微今追前勲其加賜金幣諸物山陵事殷榮盡心經度帝嘉歎進工部尙書食三祿時士奇淮皆辭尙書祿榮幼孜亦固辭不允九月帝賜榮及士奇幼孜義原吉銀章各一文曰繩愆糾繆諭以協心贊務凡有闕失或羣臣言而未從者卽密封以聞洪熙元年五月庚辰帝不豫召榮及士奇淮

義至思善門馳召皇太子時太子監國南京榮往迎於德州宣宗
卽位益推心委任宣德元年敕修厯代臣鑑外戚事鑒皆總之八
月漢王高煦反皇太后召榮等定計榮首請帝親征曰彼謂陛下
新立必不自行今出不意以天威臨之事無不濟帝從其計榮請
先驅太后壯之遂晝夜疾馳至樂安高煦出降師還以決策功受
上賞交趾數叛屢發大軍征討皆敗沒黎利遣人僞請立陳氏後
帝以表示廷臣諭以罷兵息民意英國公張輔尙書義以下皆言
與之無名徒示天下弱帝顧榮士奇曰卿二人云何對曰求立陳
氏後者太宗皇帝心也求之不得而後郡縣之迨叛亂相尋深厯
先帝憂今因其請撫而建之以息吾民於計大便漢棄珠崖前史
美之何爲示弱帝曰卿二人言是先帝意朕固知之朕志已定無

復疑者三年二月命榮及義等十八人從游萬壽山詔許乘馬從東北門入各攜從者二人至乾明門下馬登山復乘舟太液池八月從帝巡邊至遼化次寬河聞元良哈將寇邊以道陋師難并進帝畱扈行諸文臣於大營自將輕騎命榮從出喜峯口破敵而還榮獻詩十章帝召榮曰人君馭世之權孰重對曰命德討罪帝曰然二者天下公器舜舉十六相誅四凶而天下服以天下之好惡爲好惡也齊威王烹阿封卽墨不以左右之好惡爲好惡也榮頓首曰願陛下勿忘今日之言五年二月帝奉皇太后謁陵皇太后召見榮等於行殿曰皇帝數言卿等忠勤今天下清寧民生無事皆卿等贊翼之力旣還帝親賜酒於文華殿四月進少傅帝念榮先朝老臣與義等四人并輟職務惟朝夕侍議論加賜玉帶十月

帝閱邊駐蹕龍虎臺召榮等至幄中論政酌之酒八年少傅滿三載降敕褒諭九年復從巡邊至洗馬林而還明年正月帝殂時太子方九齡外廷傳言太后取金符入內欲召襄王榮士奇率百官入臨謀見太子太后卽乾清宮攜太子泣曰此新天子也榮士奇等伏謁呼萬歲浮議乃息英宗卽位委寄如故十一月命榮士奇同楊溥議臣民章奏時太皇太后委任三人三人同心輔政士奇有學行通達國體榮謀而能斷溥有雅操清謹小心每議事士奇引古義榮出一言決之諸大臣爭可否或有違言溥舍已從人略無繫吝時論賢之翕然號三楊以溥自書郡望曰南郡號爲南楊以居第曰士奇曰西楊榮曰東楊云正統元年三月榮等請開經筵并擇老成重厚識達大體者數人以供侍講之職太皇太后然

之卽命榮士奇溥及侍講學士王直等爲經筵官每十日會講於
文華殿時太皇太后委政榮等政治清明民閒亦厭兵革休息生
養爲一朝太平之盛三年四月與士奇俱進少師五年二月帝以
翰林院侍講學士馬愉侍講曹鼐入內閣預機務先是王振至內
閣語士奇榮曰朝廷事久勞公等公等皆高年倦矣當若何士奇
曰老臣盡瘁報國死而後已榮曰不然吾輩衰殘無以効力當擇
後生可任者報聖恩耳振喜而退士奇咎榮榮曰彼厭吾輩矣吾
輩縱自立彼容能已乎一旦內中出片紙令某某入直且奈何及
此時進一二賢者同心輔政尙吾人也士奇以爲然翌日列愉鼐
及侍講學士苗衷侍講高穀名以進愉鼐遂先擢用從耕籍禮成
乞歸展墓命中官護行將還病作人曰曷俟少聞榮曰君命不敢